

**V L A D A SREDNJOBOSANSKOG
KANTONA**

25

Na osnovu člana 39. Zakona o plaćama i naknadama u organima vlasti Srednjobosanskog kantona ("Službene novine Srednjobosanskog kantona", broj 2/12), na usaglašen prijedlog Ministarstva finansija i Ministarstva pravosuđa i uprave te uz konsultaciju sa Samostalnim sindikatom državnih službenika i namještenika kantonalnih organa uprave, pravosuđa i Ministarstva unutrašnjih poslova, Vlada Srednjobosanskog kantona, na 9. sjednici održanoj 16. februara 2012. godine, donosi

**U R E D B U
O NAKNADAMA KOJE NEMAJU KARAKTER PLAĆE I
DODATKU NA PLAĆU**

I. OPĆE ODREDBE

Član 1.

(Predmet Uredbe)

Ovom uredbom uređuju se uvjeti, kriteriji i način ostvarivanja naknada i drugih materijalnih prava i dodatka na plaću koji pripadaju rukovodećim i ostalim državnim službenicima i namještenicima u kantonalnim organima uprave i kantonalnim upravnim organizacijama i drugim tijelima kantonalne uprave (u daljnjem tekstu: kantonalni organ uprave) a koji nemaju karakter plaće.

II. NAKNADE KOJE PRIPADAJU DRŽAVNIM SLUŽBENICIMA I NAMJEŠTENICIMA

Član 2.

(Naknada za prijevoz na posao i s posla)

(1) Državnom službeniku i namješteniku kojem nije organizovan prijevoz na posao i s posla, a čije je mjesto stanovanja udaljeno od mjesta rada najmanje dva kilomera pripada naknada za troškove prijevoza u iznosu cijene najjeftinije mjesečne karte gradskog, prigradskog, odnosno međugradskog saobraćaja.

(2) Ako državni službenik ili namještenik ne može pribaviti mjesečnu kartu kao dokaz troškova prijevoza, kao osnov za izračun iznosa naknade za prijevoz na posao i s posla može se koristiti cijena najjeftinije dnevne karte koja se, u tom slučaju, umanjuje do iznosa mjesečne karte iz stava (1) ovoga člana, za 30%.

(3) Najjeftiniju mjesečnu i dnevnu kartu tromjesečno utvrđuje Ministarstvo privrede.

(4) Pravo na naknadu troškova prijevoza u međugradskom saobraćaju ima državni službenik i namještenik koji dolazi na posao iz mjesta prebivališta koje se nalazi van područja u kojem je mjesto sjedišta kantonalnih organa uprave.

(5) Pravo na naknadu troškova prijevoza prema ovom članu ostvaruje se na osnovu pisanoga zahtjeva državnoga službenika, odnosno namještenika, u kojem se navodi stvarna adresa u mjestu stanovanja te da svakodnevno putuje od toga mjesta do mjesta rada. Uz zahtjev se prilaže pisani dokaz firme čiji se prijevoz koristi za dolazak na posao i povratak s posla [mjesečna karta ili dnevna karta iz stavova (1) i (2) ovoga člana].

(6) Naknada iz stavova (1) i (2) ovoga člana odobrava se rješenjem koje donosi rukovodilac kantonalnog organa uprave. Zloupotreba korištenja te naknade smatra se materijalnom štetom i podliježe obavezi odgovornosti za štetu u skladu sa zakonom.

Član 3.

(Naknada za odvojeni život od porodice i smještaj u mjestu rada)

(1) Državni službenik i namještenik čije je mjesto prebivališta udaljeno više od 70 km od mjesta organa državne službe u kojem obavlja službenu dužnost ima pravo na naknadu za odvojeni život od porodice i naknadu troškova smještaja u mjestu rada, u iznosu od 200,00 KM mjesečno.

(2) Pravo na naknadu za odvojeni život od porodice i smještaj u mjestu rada u slučaju iz stava (1) ovoga člana ostvaruje se na osnovu pisanog zahtjeva, uz koji se prilaže dokaz o prebivalištu i ugovor o korištenju smještaja.

(3) Državnom službeniku i namješteniku iz stava (1) ovoga člana pripada pravo na naknadu troškova prijevoza za dane sedmičnog odmora (vikend-kartu) te za državne praznike i neradne dane u koje se, prema zakonu, ne radi, do iznosa cijene prijevozne karte u putnom saobraćaju za relaciju koju koristi.

Član 4.

(Naknada u slučaju teške invalidnosti ili teške bolesti)

(1) U slučaju nastanka teške invalidnosti ili teške bolesti državnog službenika i namještenika, ili člana njegove uže porodice, isplaćuje mu se jednokratna novčana pomoć, u iznosu dviju prosječnih netoplaća isplaćenih u Federaciji Bosne i Hercegovine prema posljednjem objavljenom statističkom podatku.

(2) Teškom bolešću iz stava (1) ovoga člana smatraju se sljedeće bolesti: akutna tuberkuloza, maligna oboljenja, endemska nefropatija, hirurška intervencija na srcu i mozgu, sve vrste degenerativnih oboljenja centralnog nervnog sistema, infarkt (srčani i moždani), oboljenje mišićnog sistema, paraliza i druge teške bolesti određene općim aktom kantonalnog Ministarstva zdravstva i socijalne politike, kao i teške tjelesne ozljede. Bolest, odnosno tjelesna ozljeda se dokazuje na osnovu dijagnoze zdravstvene ustanove.

(3) Pravo na jednokratnu novčanu pomoć iz stava (1) ovoga člana, na osnovu teške invalidnosti, ostvaruje se za utvrđeni stepen invalidnosti od najmanje 60%.

Član 5.

**(Naknada za prekovremeni rad, rad u neradne dane,
noćni rad i rad u dane državnih praznika)**

(1) Državnom službeniku i namješteniku osnovna plaća uvećat će se:

- a) za prekovremeni rad, za 50%;
- b) za rad u neradne dane, za 30%;
- c) za rad noću, za 35%;
- d) za rad u dane državnih praznika, za 50%.

(2) Naknade, odnosno uvećanja plaće iz stava (1) ovoga člana ostvaruju se donošenjem rješenja u kojem će biti precizno naznačeni vrsta poslova te period obavljanja poslova i broj njihovih izvršilaca.

(3) Dodaci na plaću prema stavu (1) ovoga člana međusobno se ne isključuju.

Član 6.

(Dodatak na plaću na osnovu posebnih uvjeta rada)

Dodatak na plaću na osnovu posebnih uvjeta rada iznosi:

- a) inspektoru, glavnom inspektoru i direktoru Kantonalne uprave za inspeksijske poslove 20% od osnovne plaće.

**Član 7. (Rješavanje o naknadama
i drugim materijalnim pravima)**

(1) Naknade i druga materijalna prava predviđena odredbama članova od 2. do 5. ove uredbe, ostvaruju se donošenjem rješenja.

(2) Rješenje iz stava (1) ovoga člana donosi rukovodilac organa državne službe u kojem je državni službenik, odnosno namještenik u službi.

Član 8.

(Ostvarivanje prava na ostale naknade)

(1) Pravo na ostale naknade utvrđene Zakonom o plaćama i naknadama u organima vlasti Srednjobosanskog kantona koje im pripadaju, rukovodeći i ostali državni službenici i namještenici u kantonalnim organima uprave i kantonalnim upravnim organizacijama te drugim tijelima kantonalne uprave ostvaruju podnošenjem zahtjeva nadležnom organu u kojem su zaposleni, koji o ostvarivanju prava na naknadu donosi pojedinačno rješenje.

(2) Rješenje iz stava (1) ovoga člana donosi rukovodilac organa.

III. ZAVRŠNE ODREDBE

Član 9.

(Prestanak važenja)

Danom stupanja na snagu ove uredbe prestaje važiti Uredba o naknadama i drugim materijalnim pravima koja nemaju karakter plaće ("Službene novine Srednjobosanskog kantona", broj: 2/06, 8/06, 3/07 i 9/07).

Član 10.

(Stupanje na snagu)

Ova uredba stupa na snagu narednog dana od dana objavljivanja u "Službenim novinama Srednjobosanskog kantona".

Broj: 01 -02-103/12
20. februara 2012.
Travnik

PREMIJER KANTONA

Tahir Lendo, s. r.

V L A D A SREDNJOBOSANSKOG KANTONA

Na osnovu člana 39. Zakona o plaćama i naknadama u organima vlasti Srednjobosanskog kantona ("Službene novine Srednjobosanskog kantona", broj: 2/12 i 3/12 - ispravka teksta), na usaglašen prijedlog Ministarstva finansija i Ministarstva pravosuđa i uprave te uz konsultaciju sa Samostalnim sindikatom državnih službenika i namještenika kantonalnih organa uprave, pravosuđa i Ministarstva unutrašnjih poslova, Vlada Srednjobosanskog kantona, na 10. sjednici održanoj 12. marta 2012. godine, donosi

U R E D B U O IZMJENI UREDBE O NAKNADAMA KOJE NEMAJU KARAKTER PLAĆE I DODATKU NA PLAĆU

Član 1.

(Izmjena člana)

U Uredbi o naknadama koje nemaju karakter plaće i dodatku na plaću ("Službene novine Srednjobosanskog kantona", broj 3/12), u tački a) stava (1) člana 6. broj "20" zamjenjuje se brojem "30".

Član 2.

(Stupanje na snagu)

Ova uredba stupa na snagu idućega dana od dana objavljivanja u "Službenim novinama Srednjobosanskog kantona".

Broj: 01 -02-192/12
15. marta 2012.
Travnik

PREMIJER KANTONA

Tahir Lendo, s. r.